

Sekso kaj Egaleco

Numero 3
Julio 1980

性と平等

Ni havas du surprizojn por vi en ĉi tiu numero de SkE. La unuan vi verŝajne jam rimarkis - efektive vi eble supozis, ke vi iel ricevis la malĝustan revuon. Sed ne; ni simple decidis montri al vi la kapon de la japana versio de nia provnumero. Kiel vi povas mem juĝi, ilia eldono aspektas tre bele, eĉ, ni devas konfesi, pli bele ol la originalo.

La japanlingva SkE, kiel ni klarigis en nia lasta numero, konsistas el tradukoj el la Esperanta versio kun raportoĵoj pri la reagoj de japanaj legantoj. La provnumero, kiu estis presita en majo en 500 ekzempleroj, estis sendita al japanaj gazetoj en kaj ekster la Esperanto-movado, kaj al individuoj, kiuj okupiĝas aŭ interesiĝas pri virinaj problemoj.

Unu gazeto de la japana virina movado jam aperigis informon pri la japana SkE. Krome, ĵurnalisto el la novaĵ-agentejo Kijodo verkis artikolon pri ĝi, kiu aperis en kelkaj lokaj ĵurnaloj.

La alia surprizo temas pri la nekutima formo de ĉi tiu numero. Oni povus diri, ke ĝi similas al tre magra elefanto, kiu svingas enorman voston. Klarigo estas, ke ni uzis la tutajn tempon kaj energion por produkti la suplementon pri diskriminacio, kiu iras kune. Ni esperas, ke ankaŭ tiuj legantoj, kiaj ne povos ĉeesti nian seminarion pri la kongresa temo, tamen ricevos la impreson, ke tiel ili povos partopreni la diskuton kun ni.

Anna Brennan

Sekso kaj Egaleco

Sendependa novaĵletero

Redaktoro

Anna Brennan
p/a Nieuwe Binnenweg 197B
3021 GA Rotterdam
Nederland

Kunlaborantoj

Audrey C.E. Childs-Mee
Probal Dasgupto
Loes Demmendaal
Lembe Laanest
Charles Power
Dermod Quirke
Louis F. v. Wunsch-Rolshoven

Jarabono (4 numeroj)
8,00 gld. aŭ 10 irk.

Sendu internaciajn respond-
kuponojn rekte al Anna Brennan,
aŭ pagu al ŝia nederlanda
poŝtĉekkonto, n-ro 4412211.

Limdato por la venonta numero:
15a de septembro.

Perantoj

Internacia (Prezo: 10,50 gld.)

Universala Esperanto-Asocio
Nieuwe Binnenweg 176
3015 BJ Rotterdam
Nederland.
Poŝtĉekkonto n-ro 37 89 64 (UEA);
Banko: Mees & Hope, Coolsingel
93, 3012 EA Rotterdam (konto
n-ro 25.52.89.804).

Brita (Prezo: £2,50)

Dermod Quirke
18 Trouville Road
London SW4 8QL.
Ĝirkonto n-ro 12 463 0006.

Itala

Alessandro Panerai
Via Pistoiese N457
I-50010 Campi-Bisenzio (FI).

Japania (Prezo: 1200 enoj)

Hukunaga Makiko
Nerima-ku, Kamisyakuzii 1-739
Midori-sŝi 2-1
Tokio, 177.
Ĝirkonto n-ro Tokio 0-99911.

Norvega (Prezo: 21 norv. kr.)

Margrete Landmark
Buerstad
N-3135 Torŝd.
Poŝtĉekkonto n-ro 5 73 61 29.

Usona (Prezo: \$4,25)

Charles Power
Nieuwe Binnenweg 197B
3021 GA Rotterdam
Nederland.
(Pago per ordinara enlanda usona
ĉeko al la nomo Charles Power.)

DISKRIMINACIO

Kun ĉi tiu artikolo, Anne Amblès sendis la du numerojn de la bulteno de Centro de Esperanto Sabadell en kiuj aperis ŝia kritiko pri la premio "Klara Silberník" kaj la komentoj pri ĝi de legantoj. Kelkaj el la komentoj estis sufiĉe akraj, eĉ ofendaj. Ni proponas, ke apogantoj de la vidpunkto de Anne skribu rekte al la redaktoro de Sabadell Esperantista, Apartat 407, Sabadell, Katalunujo, Hispanujo. ■

Responde al la demandoj pri diskriminacio kontraŭ virinoj en la Esperanto-movado: "Ĉu ĝi ekzistas? kiujn trajtojn ĝi havas?" (SkE 2/1980, p. 4-5), mi ĉi tie informas pri unu ekzemplo: la premio Klara Silberník en Hispanio. La premion iniciatis Hispana Esperanto-Muzeo, kunlabore kun Centro de Esperanto Sabadell, en 1975. Ĉiujare oni aljuĝas ĝin dum la Kataluna Renkontiĝo, fine de septembro, laŭ la jena kriterio:

"... Oni celas premii la edzinon de esperantisto, kiu plej abnegacie helpis sian edzon en lia agado por Esperanto..."

Tiu frazo eble ŝokas vin, kiel min kiam mi aŭdis ĝin, okaze ĝuste de la 1979-a aljuĝo de la premio kaj medalo.

Mi tie sidis kun katalunaj gejunuloj, kiuj same kiel mi ne ĉatis tiun diskriminacian premion, ĉar

- temas nepre pri edzino aŭ vidvino, ne pri amikino aŭ kunulino;
- temas pri unudirekta helpo, do ne pri reciproka rilato;
- ĉefe, temas pri ino kiu abnegacie helpas, alivorte, kiu laboras en ombro por vira gloro.

Tio por mi klare signifas suban pozicion por virino. Ni ne esprimis nian malkonsenton dum la aljuĝo por ne kaŭzi skandalon, des pli ke ĝi okazis dum la jarbankedo, kaj sekve en gaja etoso.

Skandalon mi tamen kaŭzis poste: oni petis de mi artikolon pri la Kataluna Renkontiĝo por la bulteno de la Centro de

Daŭrigo sur p. 6



VIRINA prezidento en Islando.

Per malgranda plimulto fariĝis prezidento de Islando s-ino Vigdis Finnbogadóttir.

La nova prezidento estas la unua virina ŝtatestro kiu elektigis per rektaj popolaj voĉdonoj en Eŭropo.

Ŝi studis literaturon en Parizo kaj Grenoblo kaj faris teatran studon en Skandinavio. Ekde 1972 ŝi estis la direktoro de la reĝkjavika teatro.

En islanda televido ŝi famiĝis pro kulturaj programoj kaj serio pri la franca lingvo. Iuj politikistoj provis malhelpi ŝian elekton per argumentoj pri ŝia eksedziniĝo.

S-ino Vigdis Finnbogadóttir diris pri sia elekto ke ŝi estas "tre grava por la egalrajteco de la virinoj".

GVIDLINIOJ por egala traktado de la seksoj en eldonaĵoj de

McGraw-Hill (Megro-Hil).

Jen la titolo de libreto eldonita en Usono. Ĝi enhavas proponojn por ŝanĝi seksismajn vortuzojn en anglaj esprimoj, ekzemple:

- virforto fariĝas homforto
- viro kaj edzino fariĝas edzo kaj edzino
- la malforta sekso fariĝas la virino.

La anglalingva libreto:

"Guidelines for Equal Treatment of the Sexes" estas senpage havebla en unu ekzemplero de: McGraw-Hill Book Co., 1221 Ave. of the Americas, New York, NY 10020, Usono.

HEROLDO fariĝis 60-jara.

En aprilo 1920 aperis la unua numero de la sendependa internacia gazeto "Esperanto Triumfonta", kiu kelkajn jarojn poste alinomiĝis "Heroldo de Esperanto".

Ĝia tiama 26-jara fondinto, s-ro Teo Jung, aperigis la gazeton kun granda entuziasmo ĝis januaro 1962, kiam li pro emeritiĝo transdonis ĝin al s-ino Ada Fighiera-Sikorska.

Dum tiuj sesdek jaroj aperis 1664 numeroj de "Heroldo". Ni esperu ke s-ino Ada Fighiera-Sikorska kiu post du jaroj povos festi sian 20-jaran jubileon kiel redaktorino ankoraŭ longe redaktos "Heroldon".

Krome, Heroldo de Esperanto eldonis en 1979 la libron "Tra dezerto kaj praarbaro" kaj nun preparas la kvaran eldonon de la libro "Paŝoj al plena posedo".

Ankaŭ eldoniĝis kelkaj sciencaj suplementoj al "Heroldo" en la lastaj jaroj. Haveblas senpage la suplementoj pri "Mensa sano" kaj "Matematiko" ĉe: HdE, C/J, Ramon Jiménez 28, 6^o A, Madrid 16, Hispanio.

5a SOMERA Universitato Virina en Berlino (FRG).

La aŭtonoma virina movado aranĝas la 5an SUV en "Freie Universität" en Berlino inter la 29a de septembro kaj la 4a de oktobro 1980.

Oni atendas ke miloj da virinoj venos al la preskaŭ senpaga aranĝo. La kostoj estos nur 4,50 germanaj markoj por la aĉeto de la programlibro. Loĝigo okazos kiel eble plej ĉe berlinaĵ virinoj.

VIRINA festivalo en Almelo (Ned).

ESPERANTO



VBBR

VROUWEN?

Nur tri tagojn antaŭ la festivalo esperantistinoj eksciis ke ili povos partopreni kun stando. Tial ili fulmrapide produktis la faldfoliojn: "Esperanto por virinoj". La festivalon vizitis pli ol 1000 virinoj. Multaj montris interesigon pri Esperanto kaj petis faldfoliojn aŭ aĉetis broŝuron. Fakte en Almelo la esperantistinoj neniam antaŭe akiris tiom da atento.

ĈINA kontraŭkoncipa pilolo por viroj.

Temas pri pilolo kies bazo estas la kotonplanto. En la kvindekaj jaroj oni komencis esplori la fakton, ke kiam la manĝoj estas preparitaj kun kruda kotonoleo, tio povas kaŭzi nefekundecon de la vira semo. Multaj testoj okazis al ratoj kaj simioj, kaj ekde 1972 la esploroj okazis al viroj. Pli ol 4000 sanaj viroj prenis la pilolon, iuj dum 6 monatoj, iuj eĉ dum 4 jaroj.

Dozo de 20 mg tage kutime alportis kompletan nefekundecon en malpli ol 2 monatoj, kvankam iuj bezonis pli longan traktadon. Konserviga dozo de 150-220 mg monate en diversaj fojoj sufiĉis. Kiam la viro ĉesas uzi ĝin, lia spermo reakiras sian fekundecon en pli-malpli 3 monatoj.

VIRINAJ ĵokeoj en Aŭstralio.

Lastatempe virinoj post longa lukto akiris permeson rajdi kiel ĵokeoj en aŭstraliaj ĉevalkonkursoj kune kun viraj ĵokeoj.

Redaktis ĉi tiun rubrikon ♀ Loes Demmendaal (Lus Demendaal), Ned.

Informojn provizis: ♀ Inge de Bruin-Kooij (Inge de Brojn-Koj), Ned.; ♀ "Heroldo", Hisp.; ♀ Elisabeth Schwartzner (Elizabet Svarcer), FRG; ♂ Renato Corsetti (Renato Korseti), Ital.; ♀ Grace Kirkwood (Grejs Kerkŭud), Aŭstral.



Esperanto Sabadell. En ĝi mi ĉefe kritikis la premion Klara Silbernik, klarigante ke la modelo de la edzino de Zamenhof ne plu povas taŭgi en nia epoko. La tradiciemuloj akre reagis, ne komprenante mian vidpunkton.

Mi ne priskribos tie ĉi la detalojn de la akrega polemiko kiun mia artikolo incitis en la katalunaj Komitato kaj esperantistaro. La afero iĝas batalo inter junuloj kaj maljunuloj. Mi deziras informi ĉiujn esperantistojn, precipe inojn, pri la ekzisto de tia premio kaj aŭdi reagon de nekatalunaj esperantistoj.

Anne Amblès (An Ablez), Francujo

La venonta Universala Kongreso en Stokholmo temos pri diskriminacio. En diversaj publikaĵoj jam aperis artikoloj pri rasa-etna, kontraŭvirina, ekonomia kaj lingva diskriminacioj, sed nenie oni vidis artikolon pri diskriminacio kontraŭ gejoj (samseksamuloj). Ĉu hazarde aŭ intence?

Franklin van Zoest (fan Zust), Nederlando

Letero el ... Kabulo?

Kelkaj legantoj verŝajne surpriziĝos vidi jenan leteron, ĉar ili ne supozis, ke ekzistas multaj esperantistoj en Afganujo. Ili ne malpravas. Eble ili do ne tiom miros eksoii, ke la letero fakte venis kun itala poŝtmarko.

Kabul, la 11an de majo 1980

Kara Sekso kaj estimata Egaleco,

Mi dankas pro la sendita ekzemplero de via revuo. Mi tra-legis ĝin kaj poste varbocelo transdonis ĝin al ina membro de nia kabula Esperanto-klubo "La Estanto Estas Fia".

Ĉi-kune mi sendas al vi ŝian foton. El ĝi vi rimarkos ke ŝi estas tre radikala inisto. Tion oni tuj rimarkas pro la larĝeco de la maŝoj en ŝia antaŭokula vid-krado. Nur senhontulinoj kuraĝas surmeti tian senpudore larĝan vid-kradon, por montri la nudajn okul-konturojn.



Mi ankaŭ legis ke vi deziras scii ĉu ekzistas diskriminacio kontraŭ virinoj en la Esperanto-movado. Mi interkonsiliĝis kun nia imamo, kaj mi fieras raporti ke almenaŭ en nia kabula klubo ni tute ne diskriminacias. Se virinoj kuraĝas viziti niajn nur virajn kunvenojn ili povus lerni la lingvon kiel ni, kaj se ili kapablas skribi ni certe ne malhelpus ilian korespondadon. Bedaŭrinde ili ne kuraĝas kaj ne kapatlas, sed tio ne estas nia kulpo.

Sincerajn salutojn,

abdelzamen hofulah

Abdelzamen Hofulah

.. SkE ... Novaĵoj ... SkE ... Novaĵoj ... SkE ... Novaĵoj ..

... Blinda interesato demandas, ĉu iu(j) leganto(j) pretus sursonbendi SkE per blinduloj. Bonvolu kontakti: José Starck, Boulevard des Guérets 46, B-4880 Spa, Belgujo.

... La rubrikon "Antaŭen kaj malantaŭen" de nun redaktas Loes Demmendaal (Lus Demendal) de Nederlando. Ĝi volonte akceptos kontribuaĵojn por tiu rubriko. Bonvolu sendi ilin al la redakcia adreso.

... SkE nun havas plurajn novajn kunlaborantojn, kiuj helpas per tajpado kaj provlegado. Kiam la malrapideco de la poŝto (kaj de la redaktoro) ne malpermesos tion, kunlaboros ankaŭ Lembe laanest de Estonio per ilustrado. Ĝi desegnis la ilustraĵojn por la artikolo "La dommastrino nekompensata" en la suplemento.

... Ne forgesu, ke la prononco de via nomo ne nepre estas klara al alilandaj legantoj. Skribante al SkE, ĝiam aldonu la prononcon de via nomo post la nacilingva literumado!

... SkE havas novajn perantojn: Alessandro Panerai en Italio, kaj Fukunaga Makiko en Japanio (adreso sur p. 2). Pro multaj informopetoj rezulte de la japana traduko de SkE, evidentiĝis bezono havi tia peranton ankaŭ por la Esperanta versio. Ankaŭ UEA de nun peras abonojn, sed pro la neceso subtrahi makleraĵon, ili kostos iom pli ol rekta pago.

... Ni ricevis demandojn pri la ebleco aperigi anoncetojn. Ni akceptos senpage anoncetojn, kiuj rilatas al la temoj de SkE. Aliaj: 10 vortoj por 1 internacia respondkupono (0,80 gld.). Ni rezervas la rajton rifuzi anoncetojn.

... Anna Brennan nun malfermis apartan poŝtĉekkonton por SkE, numero 4412211. Bonvolu adresi transpagojn ankoraŭ al la nomo Anna Brennan.

Printed by the Strangled Ale Press
18 Trouville Road, London SW4 1.

Suplemento

DISKRIMINACIO: "Oficiala aŭ efektiva apliko de tia distingo inter la ŝtatanoj de unu ŝtato, per kiu oni rifuzas al parto el ili kelkajn el la homaj rajtoj" (PIV).

Kiugrade tiu difino efektive priskribas la pozicion de virinoj? Tiu demando estos la temo de unu el la branĉoj en la seminario pri la kongresa temo, kiu okazos dum la Universala Kongreso en Stokholmo. Kiel fono al tiu diskuto ni provizas ĉi tiun suplementon al SKE, kun artikoloj pri la situacio de virinoj sub diversaj kondiĉoj.

La celo de la seminario kiel tuto estos pli bone kompreni la ĝeneralan fenomenon de diskriminacio, el kiu la kontraŭvirina estas nur unu speco. Oni povus konsideri, ekzemple, la jenajn demandojn: Kio estas la motivoj de diskriminacio? Ĉu envio al la diskriminaciata grupo, ĉu timo pro iu minaco kiun ĝi prezentas al la propraj vivstilo kaj kredoj, ĉu vera sento ke ĝiaj kutimoj estas neakcepteblaj aŭ malsuperaĵ? Ĉu la diskriminaciantoj foje profitas el la subteno de iu formo de diskriminacio, kaj ĉu tio povas en si mem fariĝi la pravigo de daŭra diskriminacio? Ĉu diskriminacio laŭdifine devas esti konscia ago flanke de la diskriminaciantoj - aŭ ĉu ili ne ĉiam konstatas, ke ili diskriminacias? Se oni apartenas al diskriminacianta grupo, ĉu eblas apartigi sin de la konduto de tiu grupo?

Se vi intencas partopreni en la seminario en Stokholmo, bonvolu peti la oficialan materialon, kiu estas nun havebla de la Centra Oficejo de UEA. Ĝi konsistas el ĉapitro tradukita el la libro Sex Differences in Human Communication (Seksaj diferencoj en homa komunikado), pri kiu aperis artikolo en la nula numero de SKE. Kiel aldonan materialon al ĉi tiu suplemento ni rekomendas la artikolon pri Hinda Unio, kiu aperis en la sama numero: Honora sed ombra rolo.

VIRINA CIRKUMCIDO

estas terurega eksceso kontraŭ knabinetoj kaj junaj virinoj en Afriko. Plej terure estas ke la virinoj mem ne vidas ke ili estas subpremataj. Ili eĉ kredas ke ili ne estas puraj, ne estas gustaj virinoj, se ili ne estas cirkumciditaj. Necirkumcidita virino estas konsiderata kiel infano aŭ kiel malĉastulino. La virinoj ricevas gravan parton de sia virina identeco per la cirkumcido, tiel rafinita estas la sistemo.

Okcidentanoj indignas pro la virina cirkumcido. Ni volas ion fari, sed kion? Multaj bone edukitaj afrikaninoj estas kontraŭ la cirkumcido kaj opinias ĝin barbara, sed ili volas mem gvidi la batalon kontraŭ ĝi. Tamen, aliaj virinoj povas esti pretaj helpi kiam ili estos petataj.

KIO ESTAS CIRKUMCIDO VIRINA? Ekaŭ estas du tipoj. Klitorektomio signifas plej ofte ke la tuta klitorio kaj la apudaj partoj de la internaj vulvolipoj estas fortranĉitaj. Infibulacio estas la pli ampleksa operacio. Krom la klitorio kaj la internaj vulvolipoj oni fortranĉas ankaŭ la plej grandan parton de la eksteraj vulvolipoj. La vulvo poste kunfermiĝas super la vaginon kaj estas kunkudrata. Truon mallarĝan kiel plumigon oni lasas por urino kaj menstrua sango. Malgranda bastoneto aŭ io simila estas enmetata por ke ne okazu plena cikatriĝo.

Tiujn informojn mi trovis en la gazeto "Morgonbris" kaj de tie mi prenas ankaŭ la rakonton de virino en Malio pri sia cirkumcidiĝo.

"Mi estis 12-jara, kiam mi estis cirkumcidita. Mi memoras ĉiun etan detalon. En nia vilaĝo estas pluraj knabinoj operaciataj je sama okazo de speciala "cirkumcidistino" en ŝia kabano. La antaŭvesperon oni ludas sur la tamburoj ĝis malfrue en la nokto.

Tre frue la venontan matenon venis du el miaj onklinoj. Ili estas inter tiuj parencoj, kiujn mi plej ŝatas. Ili prenis min al la cirkumcidistino. Ŝi estis maljuna virino el la kasto de la forĝistoj. Mi ne sciis kion vere signifas cirkumcido. Nun mi sentis ion, kio estis disŝtata sur miajn generajn organojn. Poste mi eksciis ke ĝi estis sablo. Oni evidente supozas, ke ĝi plifaciligas la operacion. Mi timegis. Subite mano ekkaptis mian

generan organon. Mi provis forsavi min, sed ne povis moviĝi. Poste mi sentis teruregan doloron, kiu traboris min kaj enpenetris la tutan korpon. Ŝi fortranĉis la internajn vulvolipojn kaj poste klitoron. Tio daŭris terurege longan tempon, ĉar ĝi devis esti farita laŭorde. Sentiĝis kvazaŭ mi estus ŝirata en pecetojn. La neskribita regulo estas ke oni ne rajtas plori je tiu okazo. Mi malsukcesis. Mi kriis kaj ploris kaj la sango fluegis. La cirkumcidistino metis miksaĵon el sanigaj herboj kaj butero sur la vundo por haltigi la sangofluon. Mi neniam, nek antaŭe nek poste, travivis ion, kio tiom doloris.

La virinoj, kiuj firme tenis min, poste liberigis min, sed mi ne kapablis leviĝi. La cirkumcidistino kriis: "Nun estas finite, vi leviĝu. Jen vi rimarkas, ke ne tiom doloris." Per helpo de du virinoj mi leviĝis. Ili devigis min ne nur iri al tiu loko, kie la aliaj knabinoj atendis, ili devigis nin ankaŭ danci. Mi ne kapablas priskribi miajn sentojn. Mia tuta korpo brulis. Kun larmantaj okuloj, mi iomete ĉirkaŭsaltis kune kun la aliaj, kiuj ĉiuj estis devigataj danci. Ĉio estis tiel horora, kun la saĝantaj kaj dancantaj knabinoj, ke ĉio ektorniĝis ĉirkaŭ mi kaj mi ne plu memoras, kio okazis poste. Kiam mi vekigis mi kuŝis etendita ĉirkaŭdata de amaso da homoj. Poste venis la plej terurega momento en mia vivo kiam mi devis urini. Daŭris monaton ĝis mi resaniĝis."

La blinda virino

Luisa Hoffmann (Luiza Hofman), FR Germanujo

Oni ne povas imagi la blindecon fermante la okulojn dum kelkaj minutoj aŭ klopodante sin orienti, momente, en mallumo. Tute ne! Blindeco estas multe pli komplika kaj problemoplena. Same kiel la surdulo tre ofte aŭdas grandan bruon en siaj oreloj, la blindulo vidas multkolorajn fajrerojn, lumojn pli malpli konstantajn kaj intensajn, devenantajn el la cerbaj nervoj, kiuj ĝenas kaj ofte malfaciligas la koncentron de la pensoj.

Mi devenas el sana, normala familio de vidantoj, sed pro mia handikapo mi lernis tre frue kiel malfacila estas la vivo de blindulo. Miaj gepatroj edukis min tiel bone, ke mi fariĝis baldaŭ memstara, unue en la familia rondo, poste en la lernejo kaj en la socio. Post la ricevo de diplomo, mi instruis en lernejo por vidantoj. Vere mizera kaj tute alia estis, tiam, la sorto de la blinda knabino, kiu frekventis la edukejon per blinduloj. Tie ŝi ricevis

maltaŭgan edukadon, kiu donis al ŝi eĉ falsan bildon de la mondo.

La edukistinoj, ofte monaĥinoj, instruis al la knabino la grandan privilegion esti blinda, savita kaj ŝirmita kontraŭ la malbonecoj de la mondo, kvazaŭ elektita por esti modele ĉasta kaj virga, lumigata de la interna lumo de pura koro, de puraj pensoj. Oni malkonsilis al ŝi la geedziĝon kaj la eblecon fariĝi patrino.

Pro la manko de antaŭpreparo kaj la falsa bildo de la normala vivo, katastrofaj estis la sekvoj kiam la knabino hejmen revenis, ne plu knabino, sed jam junulino. Okazis psikaj ŝokoj, senbazaj geedziĝoj dediĉo al la plej humilaj, simplaj laboroj. Sed la blinda knabo havis pli da ŝanco. Li ricevis pli altnivelan instruadon, kelkaj fariĝis eĉ instruistoj de muziko; al la blinda knabo oni konsilis la geedziĝon. Li bezonas edzinon, vidantan edzinon, kiu povos lin flegi kaj helpi, ĉar li estas blinda.

Feliĉe, tiu tempo estas nun for, eĉ se ĝia pasinteco ne estas tro malproksima.

Nun la edukado de la blindulino evoluadas rapide kaj konstante. La moderna tekniko alportas novajn helpilojn kaj la blindulino hodiaŭ atingas pli facile memstarecon, pli da klereco, kaj ĉiam pli ŝi estas helpata atingi la integriĝon en la mondon de la vidantoj. Ŝi preskaŭ forlasis la tipajn manlaborojn de la blinduloj: brosfarado, pajloplektado, teksado kaj similaj, favore al pli dignaj okupoj, metioj aŭ profesioj.

Ĉiam pli ofte blindaj virinoj partoprenas kursojn pri kuirarto, mastrumado, dancado, kosmetiko, laŭmoda vestado, naĝado, gimnastiko. Kelkaj blindaj virinoj ĉeestas seminariojn pri retoriko, filozofio, arto, fremdaj lingvoj; ĉiam pli da blindulinoj eniras la instruistaron en lernejoj por vidantoj.

Hodiaŭ, la blindulino elektas laŭ inklino, kulturnivelo, kapablo kaj ebleco la propran vojon, la propran vivmanieron. Ŝi povas elekti ĉu edziniĝi aŭ ne, ŝi kapablas perfekte mastrumi, konscie ŝi kapablas esti patrino kaj bone eduki la proprajn infanojn.

Rilate la temon patrineco: pro diversaj intervjuoj kaj sufiĉe ampleksa statistikado, mi konstatis ke la plejmulto da blindaj patrinoj havas vidantan edzon aŭ posedas ankoraŭ iom da vidkapablo. Ekzistas ankaŭ blindaj geedzoj kun infanoj, sed en tiu kazo la blinda patrino bezonas, preskaŭ ĉiam, vidantan helpantaron, kiu endanĝerigas ŝian rolon kaj ege influas la edukadon de la infanoj.

Dum la lastaj jaroj ankaŭ ni blindaj virinoj sekvas la evoluon de

la virina agado, la progreson de la emancipiĝo, la fazojn mult-facetajn de la feministaj vekiĝo en ĝiaj pozitivaj kaj negativaj nuancoj por atingi la samajn rajtojn kiel la viroj. Entute ni batalas flanke de la vidanta virino sur la sama fronto, sed ni havas unu plian problemon: la konkurencon de la vidanta virino.

Ofte amaraj sperto, akompanas mian vivon. Kiel instruistino, mi konstatis ke, kiam la klaso de miaj vidantaj koleginoj tro bruas, ĉiuj scias ke hodiaŭ la gelernantoj estas preskaŭ ne edukeblaj, terure viglaj, sed se tio okazas ĉe mia klaso, tiam ĉiuj scias ke blinda instruistino ja ne povas bone gardi disciplinon.

Kelkfoje, senkonscie kaj facile, vidanta virino ŝovas min flanken kiel laŭgan kunlaboranton, malhelpante al mi la atingon de celo al kiu mi strebis, pri kiu mi longe laboris, min preparis, suferis. Kelkajn negativajn konstatojn mi faras ankaŭ partoprenante ekskursojn, vojaĝojn, eĉ kongresojn. Kelkfoje la vidanto subite malproksimiĝas; la blanka bastono deklaras mian blindecon. Mi uzas ĝin kiel direktilon por trovi la vojon, por eviti stumbli ĉe ŝtuparo, por iri sola sen gvidanto. Sed por la vidanto, la blanka bastono estas signo de danĝero. Ofte la vidanto ne scias helpi al blindulo; por blindulo la vidanto ne havas tempon. Oni ja ferias, kaj vojaĝo ne estas aparte aranĝo kun helpa celo. Oni ne volas devige helpi, sed nur laŭplaĉe, spontane.

Kvankam ĉiam ekzistas gravaj problemoj antaŭ ni, ni blindaj virinoj klopodas esti ĉiam pli memstaraj kaj integriĝintaj en la mondo de la vidantoj. Ni kapablas nun labori kaj vivi apud la vidanta virino, sed nun prezentiĝas antaŭ mi la demando: ĉu la vidanta virino kapablas vivi kune kun ni, akcepti nin? Miaj negativaj spertoj avertas min ke la vidantoj bezonas pli da informado kaj pli da kontakto kun ni.

Plurfoje mi sentis la deziron fondi grupon de la handikapitaj virinoj aŭ pli specife de la blindaj virinoj, sed ĉiam mi flankenmetis mian projekton por ne apartigi, en eble tro sekteca rondo, la blindan virinon.

Ni ja diskutas niajn problemojn dum porblindulaj konferencoj kaj kongresoj. Ofte blindaj virinoj kuraĝas kundiskuti duan debatojn. Ĉiam pli da virinoj eniras niajn estrarojn. Tio estas por mi pli grava kaj valora ol fermi la blindan virinon en malgranda rondo. Mi preferas daŭrigi la batalon sur la granda kampo, kiu celas porti la blindan virinon, paŝo post paŝo, al vera integriĝo. Tion ni plene atingos nur kiam vi vidantaj virinoj sen ŝoko aŭ ĝeno pli alproksimiĝos al ni kaj plene akceptos nin, malgraŭ nia handikapo, en vian mondon.

Virinoj en la Islama Mondo

Jila Sadigi, Irano

Sciante ke la situacio de la islama virino ŝanĝigadas en la lastaj jaroj, ni hezitis ĉu uzi artikolon pri la virino en la islama mondo, kiu aperis antaŭ kvin jaroj en Unasko-kuriero. Ni petis la opinion de Jila Sadigi, iranano kaj antaŭa membro de la Komisiono pri Virina Agado. Ni ne atendis ŝian indignan reagon al la artikolo — konstrue indignan tamen, ĉar ŝi instigis ŝin mem verki la jenan prezenton pri la situacio de la virino laŭ la islama leĝo.

Eble la plej interesa parto de la artikolo de Jila Sadigi estas la klarigo pri la signifo de la vualo por la islama virino kaj precipe pri la graveco, kiam ŝi akiris kiel simbolo dum la ĵusa revolucio en Irano. Tamen, ŝiaj komentoj pri la politika situacio en Irano estis ekster la tereno de nia diskuto pri diskriminacio kontraŭ virinoj, do ni decidis aperigi nur tiujn partojn de la artikolo, kiuj rekte tuŝas sur la pozicio de la islama virino. Ni pardonpetas al la verkinto, ke farante tion ni grandparte sufokis la revolucionan fajron de ŝia originala prezento.

Ĉiuj religioj kaj politikaj sistemoj diversiĝas en ĉiu lando aŭ eĉ regiono, tiel ke ili preskaŭ ne plu estas rekoneblaj laŭ siaj originaj doktrinoj. En nia lando (Irano), la diferencoj inter la situacioj de virinoj en diversaj partoj estas neimageble grandaj.

Islamaj virinoj en multaj regionoj, precipe en la nordaj provincoj, Gilan-Mazandaran, ĉe la Kaspia Maro, komplete regas la familion. La edzoj faras nenion sen la permeso de siaj edzinoj. Tia virino (tute libera, senvuala, duonnuda ĉe la marbordo, societema, aktiva ekster la domo) decidas ĉion pri la vivo de la familio: pri la infanoj (iliaj edukado, laboro, geedziĝo) kaj pri financaj aferoj. Ŝi supozeble nomu tion matriarka sistemo sen poliandrio.

Aliflanke, en Azarbaĵĝan-provinco en la nordokcidento de Irano, kie la lingvo de la plimulto estas la turka, la virinoj estas kovritaj per vualoj. Tion tute ne davigas la viroj; ili mem preferas ĝin. Ili ne estas tre aktivaj ekster la domoj, kvankam multaj havas eksterajn laborojn. La ĉefo de la familio estas la viro. Iomete patriarka sistemo.

Tio montras la influon de la geografia kaj sennombraj etnaj faktoroj en la vivo de popolo, sendepende de la religio. En neniu islama lando la situacio de la virino estas sama, pro la diversaj politikaj sistemoj kaj branĉoj de Islamo.

Sube mi arigas kelkajn punktojn de la islama leĝo, por ke, minimume, esperantistinoj iom komprenu la Islamon.

Laŭ Islamo geedziĝo ne estas sakramento kiel laŭ katolikismo. Ĝi estas simpla kontrakto inter viro kaj virino, kiel ĉiu alia socia kontrakto inter du homoj. Se unu partnero ne obeas la regulojn de la skribita kontrakto, la alia havas la rajton tuj nuligi ĝin. Edzino laŭ Islamo havas la rajtojn labori ekstere, naski aŭ ne naski, eksedziniĝi en difinitaj cirkonstancoj, nutri aŭ ne nutri la infanojn per sia lakto, elekti la loĝlokon, doni aŭ rifuzi la rajton de reedziĝo al la viro, ktp. Ju pli la virino scias pri siaj rajtoj laŭ Islamo, des pli bonajn kondiĉojn ŝi povas gajni en la kontrakto.

Se iu virino pro ekonomia malfacilaĵo volas edziniĝi al iu, kiu havas alian edzinon, kaj se la unua konsentas pri la afero, tia aranĝo ĝenas nenion. Ĝi eĉ povas helpi multajn malriĉajn virinojn. Tamen, feliĉe, poligamio iom post iom malaperas en multaj landoj, pro la plimultiĝo de eksteraj laboroj por la virinoj. Nuntempe en Irano 4-5% de la popolo praktikas poligamion. Neniu religiulo konata havas du edzinojn, kompreneble!

La sola kondiĉo, kiu donas al islamano la rajton eksedziĝi estas la interrompo de seksrilato. Se la edzino pro kia ajn kaŭzo ne plu volas aŭ povas daŭrigi la seksrilaton kun sia edzo, li povas postuli la rajton je eksedziĝo. Tiel estas ĉar la bazo kaj la kaŭzo de geedziĝo en Islamo estas seksbezono kaj seksdeziro. Do, se unu el la paro ne plu bezonas tiun rilaton, la esenco de la geedziĝkontrakto fariĝas sensignifa, vole-nevole. Viro ne povas eksedziĝi pro alia kaŭzo krom tiu. Eĉ se la edzino faras nenion krom dormi, promeni kaj manĝi!

Se islamano naskas infanon, kies patro ne estas konata, la

koncernaj personoj devas trovi lin. Tio necesas, ĉar laŭ Islamo la patro estas la homo, kiu respondecas finance pri la infano. Se oni ne trovas la patron, la virino ricevas la tutan koston por la vartado de la infano el bejtulmal (domo de riĉaĵo), komuna islama provizejo.

. . . .

Ĉiu sana virino havas la rajton je posedaĵoj laŭ Islamo. Se ŝi posedas kapitalon, ŝi povas mem decidi kiel uzi ĝin kaj la edzo ne rajtas tuŝi ĝin sen ŝia permeso. Se edzino havas eksteran laboron, ŝia edzo havas neniun rajton super ŝia laborenspezo. Laŭ la Korano ne ekzistas diferenco inter viro kaj virino rilate la rajton je laboro, salajro aŭ eduko.

. . . .

Pri la vualo kaj la kovrita islama virino: Kiam Mohamedo fondis Islamon en Arabio, ne nur virinoj sed ankaŭ viroj estis tute kovritaj per longaj roboj kaj kaptukoj, kiuj ŝirmis ilin kontraŭ la ekstremo de la klimato kaj la neeltenebla brulado de la suno. Tute samaj estas la vestaĵoj en la suda parto de Irano, kie la vetero estas ege varma. Tie la virinoj portas blankajn molajn vualojn somere, kaj nigrajn dikajn vintre.

Okcidentaj ĵurnalistoj malĝuste aludis al la islama vualo por virinoj por malbeligi la vizaĝon de nia granda revolucio. Vualo kaj turbano estis la tradiciaj kaj bezonataj vestoj, kie Mohamedo naskiĝis. En aliaj landoj, kie la vetero ne estas tiel ekstrema kiel en Arabio, ili tamen fariĝis la simboloj de la mohameda revolucio por fidelaj geislamanoj. Sed nenie oni devige surmetas ilin.

Antaŭ la lastatempa revolucio en Irano, oni tre malofte vidis virinojn kun vualoj en la nordo de la ĉefurbo Tehrano. Sed dum la revolucio, virinoj tre volonte surmetis nigrajn vualojn por montri la revoluciajn unuecon kaj identecon. Eĉ universitatanoj, kiuj neniam en sia vivo havis vualojn, rifuzis marŝi ekstere sen vualoj aŭ specialaj kaptukoj...

La virinoj partoprenis en la revolucio eĉ pli vigle kaj kuraĝe ol la viroj. Tiu simbolo -- nigra vualo -- povis redoni al niaj virinoj neimageblan solidarecon. Ili povis tuŝi kaj senti siajn perditajn kuraĝigajn identecon kaj fratinecojn sub tiuj vualoj. Mi ne kapblas -- eĉ per Esperanto! -- difini la kuraĝon aŭ eĉ impertinenton de la virinoj, kiam ili kovras sin per tiuj vualoj. Sen tiuj, ili estas pli belaj, sed samtempe malkuraĝaj, pasivaj, hontemaj, silentaj kaj sentemaj. Se iu islama virino povas fariĝi pli kuraĝa sen la vualo, tamen ŝi ne rajtas kontraŭstari ilon, per kiu alia islamano atingas la samon.

Nuntempe, la plimulto da junaj virinoj kaj fraŭlinoj ne plu portas longajn vualojn, sed surmetas kaptukon, kiu kovras la harojn. Laŭ ŝi, ili faras tion por ne reperdi la identecon kaj unuecon. Kompreneble tio neniel estas deviga. Multaj ventas sin kiel eŭropaninoj, ĉar tion ili preferas, sed por montri la batalemecon, kiel novan modon, ili volonte surmetas tiujn kaptukojn. Se oni demandus la kialon, ili respondus: "En Islamo sen seksa allogo oni pli bone povas koni kaj konigi la realon, kaj plialtigi la menskapablon".

Mi celas montri, ke Islamo ĝenerale kaj la islama virino specifas devas esti redifinitaj, en nia tempo, por distingi la antaŭjuĝojn tiurilate. Antaŭ la revolucio ekzistis multaj virinaj organizaĵoj, sed iliaj anoj estis mallaboremaj, tre riĉaj kaj ne seriozaj virinoj, kiuj simple serĉis distraĵojn.

En nia lando ne ekzistas diferenco inter la homoj, inter viroj kaj virinoj. Nia problemo estas la diskriminacio de la mondo kontraŭ la tuta popolo de la lando. Tiu estas la diskriminacio, kiun oni devas kontraŭstari en Irano. Kaj ĝis tiu malapero, aliaj organizaĵoj estas sensignifaj.


ĈU EKZISTAS DISKRIMINACIO KONTRAŬ VIRINOJ EN LA E-MOVADO?

Tiu estis la temo, kiun ni levis en la lasta numero de SkE. Por faciligi ĝian traktadon en nia diskuto pri diskriminacio, ni nun ripetas kelkajn el niaj bazaj demandoj:

Gvidantaj virinoj. Kiuj estas la plej bone konataj virinoj en la internacia Esperanto-movado? Kiom da afektiva potenco ili ĝuas, kaj kian? Kuj faktoroj en iliaj personecoj aŭ vivstiloj ebligas al ili sukcesojn? Kio malhelpas, ke aliaj virinoj atingu similan nivelon?

Esperanto-literaturo. Kiel virinoj estas prezentitaj en la Esperantaj gazetaraj, lernolibroj, beletraĵoj? Ĉu tiuj fontoj emas pli fortigi la seksajn stereotipojn? Ĉu ekzistas iuj elstaraj inaj rolantoj en la Esperanto-literaturo?

Loka kaj nacia agado. Kiuj estas la proporcioj de viroj/virinoj? Ĉu unu sekso pli ol la alia emas forfali el E-agado? En kiuj proporcioj la seksoj troviĝas en gvidaj pozicioj? Kiuj faktoroj ludas rolon en la agado de membroj de via grupo (ekz.: aĝo, sekso, geedza stato, infanoj...)? Kiel tiuj faktoroj influas la regulan vizitadon al la grupo? Kiel personaj kaj seksaj rilatoj influas partoprenon en la grupa agado? Ĉu viroj aŭ virinoj kutime havas pli bonan lingvoscion? Kial? Kiu pli parolas dum renkontiĝoj?



La jena bildo aperis en la februara numero de la revuo Esperanto kiel ilustraĵo al la artikolo "Virinoj - ŝanĝoj necesas en la tuta socio". Bedaŭrinde, mankis la klarigo, kiu donas al la bildo signifon.

Ĝi montras seksan diskriminacion je la plej fundamenta nivelo - ĉe la divido de manĝo. La subnutrita knabino maldekstre kaj la pli fortika knabo dekstre estas ĝemeloj. La diferenco inter ili baziĝas sur la fakto, ke oni ĉiam nutris unue la knabon, tiam donis al lia fratino la restaĵon. En ĉi tiu foto, la energia knabo postulas, kaj ricevas, atenton. La apatia knabino rezignis eĉ provi.

vira,

ina

aŭ neŭtra?

En la sekvontaj paĝoj ni prezentas eltiraĵojn el artikolo, kiu unue aperis en la "virina numero" de Unesko-kuriero dum la Internacia Jaro de la Virino (aŭg-sep. 1975).

Du kontraŭaj vidpunktoj estas esprimitaj. En letero al moskva literatura gazeto (vidu la kadron sur p. 12), soveta virino asertas, ke la trajtoj de virinoj estas fiksitaĵ ne tiom de biologiaj kiom de kulturaj faktoroj.

La aŭtoro de la artikolo, internacie konata soveta sciencisto, kontraŭstaras tiun vidpunkton. Li opinias, ke la influo de la socio nur plifortigas la jam ekzistantajn seksajn trajtojn en la infano. Provoj ŝanĝi la biologie determinitajn seksajn rolojn kaŭzas psikajn perturbojn en la individuo, kiu ne plu klare rekonas sian pozicion en la socio.

La artikolo tuŝas unu el la plej fundamentaj demandoj pri la virina rolo: ĉu ĝi estas nature difinita aŭ ĉu ĝi estas ŝanĝebla? Certe, ne ĉiuj havos la saman opinion pri la respondo. En la nuna stato de niaj socioj, mankas la necesaj kondiĉoj por atingi definitivan konkludon. Tamen, estas grave diskuti tiun demandon, ĉar sur la respondo nepre baziĝos la estonta evoluo de la pozicio de virinoj.

La letero citita apude, kiu lastatempe aperis en la moskva literatura revuo Literaturnaja gazeta, diskutas ekstreme gravan problemon rilatan al la profundaj ŝanĝoj, kiuj okazis en la soveta socio.

La aliro de virinoj al la egaleco kun viroj levas tutan serion da problemoj. Ekzemple, gajninte egalajn rajtojn kaj liberecon, en kiu direkto la virinoj evoluigu sian personecon?

En sia letero, s-ino Lvova fakte pretendas, ke devus esti neniu diferenco inter virinoj kaj viroj en la laboro, en la socia vivo aŭ en la familio, ke knaboj kaj knabinoj devus ricevi precize la saman edukon kaj ke egalrajteco implicas identan konduton kaj sintenon ĉe viroj kaj virinoj.

Sed la ĝeneralan opinion en multaj landoj lastatempe iom skuis kreskanta tendenco ĉe viroj "inestiĝi" kaj ĉe virinoj "virestiĝi". Kien ĉi tiuj ŝanĝoj en nia civilizo kondukas nin? Ĉu ni, fakte, atestas la malaperon de la divid-linioj inter la viraj kaj virinaj psikologio kaj konduto?

Evidente, necesas unue konsideri la naturon de la psikologiaj diferencoj inter viroj kaj virinoj. Ĉu ili devenas nur el biologio aŭ ĉu ilin tute kaŭzas faktoroj sociaj? Ĉu identa eduko de la du seksoj vere malkonfirmus ĉiujn teoriojn pri la influo de la inaj biologiaj trajtoj sur la virinan psikologion?

Kompreneble, virajn kaj virinajn rolojn determinas ne tiom biologiaj kiom sociaj, ekonomiaj kaj kulturaj faktoroj. Sed tio ne signifas, ke hodiaŭ, pli ol en la pasinteco, la naturo de la sociaj roloj de viroj kaj de virinoj povas esti laŭplaĉe ŝanĝataj. Ili baziĝas sur biologiaj fundamentoj. Eventuala ignoro de ĉi tiu elementa fakto okazigos seriozajn sekvojn.

La formiĝo de la individua personeco estas intime ligita al la nekonscia elekto de specifa kondut-ŝablono -- elekto, kiun infano faras sub la influo de ĉirkaŭuloj.

En la komenco, la infano simple imitas iujn el la eksteraj trajtoj de la persono, kiun ĝi senkonscie elektis kiel modelon -- tiajn

Se la vorto "emancipiĝo" nuntempe vekas skeptikan rideton, tio okazas ĉar la emancipiĝo kiel koncepto estas plena de internaj kontraŭdiroj. Kion pri ĝi diras al ni ciferoj en sia neemocia lingvo? Ke en 1969, ekzemple, troviĝis en Sovetunio 62-oble pli da virinoj kun altlerneja kaj faka edukado ol troviĝis en 1928: entute 9 500 000 virinoj, nome, 60% el ĉiuj tiunivelaj diplomitoj.

Okazis multaj ŝanĝoj rilate la rangon de virinoj, kaj tamen io mankas ankoraŭ... Mi kredas, ke virinoj estas psike nepretaj por la rajtoj kaj liberecoj, kiujn oni ĵetis sur ilin.

Jarcentoj da subpremo donis al virinoj eraran opinion pri iliaj propraj kapabloj. Tiu opinio, pro la forto de la inerto, vivas plu en la konscio de la nuntempaj virinoj. Venis jam la tempo, kiam virinoj konstata sian novan rangon en la socio. Sed kiamaniere ili faru tion?

Eduko, medio, libroj kaj artaĵoj, kiel ni scias, povas ludi gravan rolon en la veko kaj disvolvo de la homa menso. Virinoj do devas ricevi ekde la frua infanaĝo tian moralan trejnon, kia preparos ilin por la enormaj sociaj ŝanĝoj, kiuj okazis en nia lando.

Sed, ĝis nun, la edukado de knabinoj karakterizis inerto, kiu persistas kun surpriza kapablo daŭri. Gepatroj mem verŝas en siajn filinojn specifajn sintenojn, kiuj klarigas la abismon, kiu en la posta vivo aperas inter la fundamentaj aspiroj de la viroj kaj tiuj de la virinoj.

La vartado forte efikas sur la vivon de virino. Mi kredas, ke, se knabinojn oni ĝuste gvidus rilate la evoluigon de taŭga sistemo de valoroj, tiam ĉiuj argumentoj pri la influo de la biologiaj trajtoj de virinoj sur ilian psikologian konsiston montriĝus senbazaĵ. Polaj sociologoj konkludis, ke la inaj psikaj trajtoj, kiom ili efektive ekzistas, rezultas pli el kulturaj faktoroj ol el kunnaskitaj, seks-rilataj faktoroj. Ili rezultas precipe el la maniero, laŭ kiu oni edukas knabinojn, kiu siavice grandparte dependas de la koncepto, kiun la socio havas, pri la rolo de virinoj.

N. Lvova

(el letero al la moskva literatura revuo
Literaturnaja gazeta)

psikologiajn trajtojn kiel afableco, malakraeco, sentemo, aŭ kiel decidiĝo, kuraĝo, firmo.

Kondut-ĉablonoj akcepteblaj por la sekso de la infano estas kuraĝigataj. La neakcepteblaj estas malkuraĝigataj. Knabojn, ekzemple, oni hontigas for de la plorado. Knabinoj estas riproĉataj pro knabeca konduto.

Oni konstatis, ke la gepatroj, precipe la patrino, nekonacie adoptas malsaman sintenon al virinfano aŭ infanino jam ekde ĝia naskiĝo. Esploroj en Usono montris, ke dum la unuaj ses monatoj patrinoj tenas kaj karesas filojn konsiderinde pli ol filinojn.

Sed, post la tempo dum kiu virbeboj estas ofte karesataj, patrinoj provas ilin malkutimigi de tio. Oni permesas al unujara knabino pasigi multe pli da tempo kun la patrino kaj havi pli da korpa kontakto kun ŝi, ol al samaĝa knabo.

Ĉar ĉi tiu malpliigo de la kontakto kun la patrino kreskigas la memstarecon de la infano, esploristoj konkludis, ke patrinoj intuicie provas disvolvi tian memstarecon ĉe siaj filoj, kuraĝigante ilin esplori kaj "konkeri" la mondon ĉirkaŭ si.

Sed, kial infano elektas specifan modelon de vira aŭ virina konduto? La respondo estas, ke la reagoj de la infanoj dependas de ĝiaj biologiaj ecoj. Infanoj elektas kiel modelon sian patron aŭ patrinon ĉefe laŭ tio, ĉu ĝi trovas pli facila la adaptiĝon al vira aŭ al virina rolo.

Ĉi tiu facileco-principo gravas ĉe la elekto fare de individuo de specifa socia rolo. Tio, ke iu individuo elektis difinitan rolon, montras, ke tiu rolo respondas al ties naturaj karaktereroj. Iu knabo, ekzemple, povas reŭi ke li fariĝos boksisito; sed, se li estas laŭnature tre sentema al la doloro, li baldaŭ rezignos pri tiu neatingebla celo.

Same estas ĉe elekto de seksa rolo. La facilo, laŭ kiu individuo povas akcepti sian rolon, dependas de biologia antaŭinklino, kiun poste plifortigas la influo de la socia medio. La infano, tiamaniere, iom post iom eksentas apartenon al difinita sekso, ellaboras specifan tipon de konduto, kaj fine fariĝas definitive konscia pri sia identeco kiel viro aŭ kiel virino.

...

Gepatraj provoj "transformi" siajn filojn en filinojn aŭ fari el knabinoj knabojn kondukas al malfeliĉaj rezultoj. La studoj kon-

statigas, ke patrinoj neniam ludintaj per pupoj en sia infanaĝo ofte malhavas patrinajn sentojn kaj lertecojn, kaj ke knaboj dorlotitaj poste fariĝas korpe malfortaj, timemaj kaj dependemaj. Kiam ili plenkreskas, tiaj infanoj ofte montriĝas nekapablaj plenumi la rolojn, kiujn la socio bezonas, ke ili plenumu.

En multaj modernaj familioj, la roloj de la viro kaj de la virino fariĝis tiel nedistingeblaj, la divid-linio inter ili tiel neklara, ke infano havas nenan eblecon elekti inter malsamaj kondut-modeloj. La bildoj de la forta, kuraĝa, rigora, malceda patro kaj la tenera, mola, komprenema patrino nebuliĝis kaj similiĝis. Kiun el ili la infano imitu? Kun kiu ĝi identigu sin? La problemo fariĝis tiom kompleksa, kiel ni mem persone vidis en multaj kazoj, ke certe ne ĉiuj infanoj sukcesas trovi solvon...

La moderna scienco nun havas sufiĉe da pruvoj por montri preter dubo ke sento pri sia seksa idento kiel viro aŭ virino estas esenca kvalito de la personeco, kaj ke homo, al kiu tiu mankas, ne kapablas ĝui normalan vivon en la socio.

Nuntempe, kuracistoj bedaŭrinde devas ĉiam pli ofte pritrakti homojn, kiuj ial perdis iugrade ĉi tiun identeco-senton. La studo de tiaj kazoj klare montras, ke iu ajn vola aŭ nevola psika devojiĝo de la aparteno al unu difinita seksa povas konduki al grava psika perturbigo, al severaj patologiaĵoj kaj finfine al tragikaj sekvoj.

Perdo de ĉi tiu apartena sento kaŭzas profundajn ŝanĝojn al la tuta personeco. La individuo ne plu certas pri sia loko en la socio. Ties tuta sistemo de rilatoj kun aliaj estas skuita, kaj perdiĝas la sento de ligiteco al amikoj kaj parencoj, al konataj lokoj, al la laboro kaj al la vivo mem.

...

Unu afero, tamen, estas certa. Egaleco inter la seksoj ne devus konduki al malklariĝo de la psikologiaj limoj inter ili, al seks-neŭtrala konduto. La plej bona garantiilo pri la harmonio en interseksaj rilatoj estas la agnosko, ke la naturaj roloj de la seksoj estas distingendaj kaj malsamaj, ne identaj.

Dum jarcentoj la socio propagandis la bezonon bridi la seksan deziron, sed tute ne atentis la gravecon de la seksa konscio en la evoluo de la homa personeco. Nun la scienco devas kontribui al la urĝa tasko de esplorado pri la veraj faktoroj, kiuj regas la seksan konduton.

Tradukis: Probal Dasgupto



LA DOMMASTRINO NEKOMPENSATA

Kirsten Ordning Haarr

Lauŭleĝe ni norvegaj virinoj ĝuas egalajn rajtojn kun la viroj. Sed la leĝo ne donas respondojn al du esencaj demandoj. Kiun rolon ni intencas ludi en la ekonomia, socia kaj kultura vivo de nia lando? Lauŭ kiaj kriterioj ni volas vivi?

En Norvegujo 579 000 virinoj rigardas hejmlaboron kaj varton de siaj infanoj kiel la ĉefan okupon, kvankam multaj el ili ankaŭ konstante laboras ekster la domo po 20 horoj ĉiusemajne. Tre mal multaj el tiuj 579 000 ĉeestas kiam la viroj diskutas ekonomiajn, socialajn kaj homajn demandojn, starigas prioritatojn kaj asignas monrimedojn. La malmultaj virinoj kiuj ja ĉeestas malofte kuraĝa aŭ eĉ volas kontraŭstari la virojn kiuj superregas tiujn diskutojn

Ĉu ni do devas konkludi ke la virinoj havas neniun influon sur la disvolviĝon de nia nuntempa socio?

Tute ne! Laŭ mia opinio la virinoj vivas laŭ kriterioj kiuj ne havas signifon en la prioritato-listo de la politikistoj. Sur tiu listo troviĝas nur eroj, kiuj estas mezureblaj laŭ kvanto aŭ rilate al mono.

Tamen la socio ĝenerale kaj ĝiaj individuaj membroj dependas por sia plua ekzisto de la konservado de virinaj kriterioj — kompreneble flanke de la virinoj mem, sed prefere de la viroj kaj virinoj kune.

La patrinoj de malgrandaj infanoj havas labortagon de 24 horoj kaj laborsemajnon de 168 horoj. Ili ne ricevas salajron, ne havas fiksitajn laborhorojn, havas nenion da tempo disponebla al si mem kaj nenian ferion pagatan aŭ nepagatan. Ili ne ricevas monon dum malsano kaj ne assekuriĝas kontraŭ akcidentoj dum ili laboras en la hejmo. Malofte ili vidas siajn nemojn sur la ĉefa pordo aŭ en la telefonlibro.

Tiuj virinoj aŭdas multfoje ke ili ne havas profesion kaj ne faras veran laboron. Verdire, en nia moderna socio, laboro signifas la plenumon de taskoj — ne gravas kiel malutilaj aŭ senvaloraj — por kiuj oni ricevas pagon.

Salajro estas malbona kriterio por "laboro". Kio okazas kiam iu alia virino transprenas la rolon de la dommastrino por fari parton de ŝia laboro dum parto de la tago? La respondo estas ke ĉiuj rigardas ŝin kiel la plej gravan, laboreman, kapablan kaj nemalhaveblan personon en la domo, simple pro tio ke ŝi ricevas monon kaj socialajn beneficojn por sia laboro.

Ekde la momento kiam en nia moderna socio virino naskas, ŝi estas kondamnita al neniam ĉesanta labortago kaj ŝi ofte konstatas ke ŝi kun sia infano subite izoliĝas de la cetera socio. Niaj ekonomikistoj kaj politikistoj ankoraŭ ne rompis la kapon por elpensi kiel ŝia labortago povas fariĝi malpli longa kaj pli facila.

Krome la sola rimedo kiun ili povas proponi kontraŭ ŝia izoliteco (kiu povas finfine okazigi mensan kolapson) estas sendi ŝian infanon al vartejo dum 9 aŭ 10 horoj ĉiutage, sub tute ina zorgo, kaj doni al la patrino alian oficon — sendube kontraŭ malalta salajro, cetera.

Kial okazas, ke nuntempe la infanoj estas pli kaj pli rigardataj kiel multekosta kaj nenecesa ŝarĝo, ĝeno kaj problemoj? Ĉu ni ne forgesas, ke la estontecon de la mondo decidas la kresko- kaj evolu-eblecoj, kiujn ni donas al niaj infanoj, kaj la konscio pri valoroj, kiun ni starigas en ili?

Dum la infanoj pli kreskas, la patrino kiu laboras en la hejmo povas pli libere moviĝi. Sed eĉ tiam ŝi ankoraŭ povas trovi la manojn plenaj dum ŝi laboras pri projektoj kiuj estas esencaj por ŝia familio kaj por la komunumo.

Ŝi havas tempon por prizorgi la membrojn de sia familio, sanajn kaj malsanajn, junajn kaj maljunajn, krome foje ankaŭ aliajn. (Je la fino de 1972 ni havis en Norvegujo 456 712 infanojn sub la aĝo de sep jaroj, sed por nur 19 000 estis lokoj en infanvartejoj. Troviĝis 194 910 norvegoj kiuj aĝis almenaŭ 75, sed por nur 32 000 el ili estis loĝebleco en prizorgejoj.)

Ŝi prizorgas siajn hejmon, vestojn, meblaron kaj tolaĵojn por eviti la aĉetadon de novaj antaŭ ol vere necesas.

Ŝi aĉetas ŝtofon kaj lanon por kudri kaj triki vestaĵojn.

Ŝi aŭ akiras aŭ produktas manĝaĵon kaj se ŝi loĝas ĉe bieno ŝi semas kaj rikoltas.

Ŝi aliĝas al studgrupoj por plibonigi siajn kvalifikojn.

Ŝi faras socialan laboron en la komunumo kaj persvadas la lokajn instancojn doni prioritatan subtenon al projektoj por helpi infanojn, adoleskulojn kaj maljunulojn.

Entute, ŝi estas, nekonscie, efektiva ekologo.



Virinoj en ĉiuj mondpartoj havas multe da komunaj interesoj, pli laŭ mia opinio ol la viroj. Prizorgi bazajn vivbezonojn estas precipe nia afero, kie ajn ni loĝas.

Do kial ni ne laŭte protestas kiam ni aŭdas ke ni estas ekonomiaj ŝarĝoj sur niaj edzoj? Kial ni ne leviĝas kolere kiam oni nomas nin ĝeno al la socio ĉar ni faras nenion, kio aldonas al la Malneta Nacia Produkto?

Estas ja malrespekte diri al ni, ke ni ne helpas konstrui la socion nek aktive partoprenas en la disvolviĝo de nia lando. Aliflanke mi opinias, ke ni devas ĝoji, kiam homoj diras ke ni ne ludas rolon en la konstruado de la "brava nova mondo"* de teknologio, regata de komputeroj.

La viroj en nia moderna socio konstruis por si gigantan ludejon kaj plenigis ĝin per maŝinaro, mono kaj financo, teknologiaj subtilaĵoj, armiloj kaj intelektaj ekstremoj.

Kelkaj virinoj volas nenion pli ol iri en tiun ludejon kaj labori sub la gvido de la viroj. Hodiaŭ niaj viroj strebas allogi ĉiujn norvegajn virinojn en sian ludejon ĉar ili bezonas helpantojn. Sed ilia pensado estas skizofrenia. Ili volas la virinojn en sia ludejo, sed ili tute ne povas fronti siajn hejmojn sen la "virineto".

Oni diras, ke la virinoj, kiuj pakas ĉokoladojn dum ok horoj ĉiutage, trovas kontentigon pro sia partopreno en la inspira procezo de la produktado. Laŭ ia mistera maniero, la vorto "produktado" fariĝis sinonimo de "pagata laboro".

Verdire, multaj el tiuj ĉi virinoj efektive trovas kontentigon -- sed ne pro la pakado de ĉokoladoj. Ili trovas ĝin produktante esencajn varojn kaj servojn en la propraj hejmoj post la laborhoroj, nokte, sabate, dimanĉe kaj dum la somera ferio.

Mi ne vidas validan kialon por ne kalkuli ĉi tiun produktivan hejmlaboron laŭ mono. Ni devas nur fiksi tarifojn por gravedeco, nanko kaj vartado, kaj ni ne forgesu, ke la homa lakto estas valora nutraĵo, kiu meritas altan prezon.

Ankaŭ necesas specialaj tarifoj por kromlaboro, ferio-pago, kaj rekompenco por maleportunaj laborhoroj, nokta laboro, dimanĉa laboro ktp.

* Aludo al fantazia romano de la brita aŭtoro Huxley (Haksli).

La finkalkulo estus astronomie alta. Kaj finfine la ekonomikistoj devus konfesi, kial la virina laboro neniam estas esprimata laŭ mono, kvankam ĝi ja estas kalkulebla. Verdire, ne ekzistas sufiĉe da mono en la mondo por ĝin rekompenci.

Ni scias ke la "evoluo", kiun tre kleraj viroj instigas en industriaj landoj, jam venigis nin al la rando de katastrofo. Kaj ni virinoj de la mondo je nia eterna honto faris malmulte por haltigi ilin.

La viroj malŝparas krudajn materialojn, kiujn ili neniam povas anstataŭigi. Ili foruzas bonan humon kaj ŝanĝas ĝin en sablon kaj asfaltan. Ili endanĝerigas la manĝoprovizon en la maro sen kiu la homoj de la mondo ne povas pluvivi.

Ili similas al aŭtomobilistoj kiuj retroŝoforas al la abismo dum ili fikse rigardas antaŭen. Ĉis nun la aŭtoj ne malsuprenfalis ĉar la virinoj funkciis kiel bremsoj.

La multaj esencaj varoj kaj servoj, per kiuj la virinoj provizas la hejmon, ne postulas grandan konsumadon de naturaj rimedoj. Nur kiam la virinoj paŝas en la viran ludejon kaj akceptas virajn valorojn, ili helpas malriĉigi la mondon.

Du malsamaj vivstiloj ŝajne disvolviĝas tra la tuta mondo — unu farita kaj praktikata de la viroj kaj la alia de la virinoj. Ekzistas vera konflikto inter la du — silenta lukto de unu sistemo de kriterioj, ligita al mono, teknologio kaj ĉio mezurata laŭ "vivniveloj", kontraŭ alia, bazita sur tiu plenumo de fundamentaj korpaj kaj mensaj bezonoj, kiun ni nomas "kvalito de la vivo".

Ni, la virinoj de la mondo, devas ekuzi niajn kapojn. Ni elpensu. Ni parolu al niaj viraroj. Ni elpaŝu ekster la domojn kaj devigu la virojn elpaŝi ekster siajn ludejojn. Ni kunveniĝu kiel partneroj kaj egaluloj, aŭskultu, parolu kaj laboru kune. Kune ni eltrovu, kiel ni povas harmoniigi la vivstilojn de la viroj kaj la virinoj kaj kune klopodi savi la mondon, kiun heredos niaj infanoj.

Artikolo el Unesko-kuriero aŭg-sep 1975
tradukita de Grace Kirkwood (Grejs Kerkünd)
Cobi Pothuizen (Kobi Pottheizn)